

## SAMÞYKKT

### um breytingu á samþykkt um stjórn Reykjanesbæjar og fundarsköp bæjarstjórnar, nr. 622/2019.

#### 1. gr.

1. gr. samþykktarinnar breytist og verður svohljóðandi:  
Bæjarstjórn Reykjanesbæjar er skipuð 11 bæjarfulltrúum kjörnum samkvæmt 11. gr. sveitarstjórnarlaga nr. 138/2011. Um kosningu bæjarstjórnar gilda kosningalög nr. 112/2021.

#### 2. gr.

4. tl. 6. mgr. samþykktarinnar breytist og verður svohljóðandi:  
Ákveða stjórnskipan bæjarfélagsins og ráða bæjarstjóra og starfsmenn í helstu stjórnunarstöður hjá bæjarfélaginu.

#### 3. gr.

6. mgr. 15. gr. samþykktarinnar breytist og verður svohljóðandi:  
Tilkynna skal kjör forseta, 1. og 2. varaforseta til innviðaráðuneytisins þegar að því loknu. Sé enginn forseta á fundi gegnir aldursforseti forsetastörfum, nema bæjarstjórn ákveði að kjósa sérstakan fundarstjóra. Ef forseti deyr eða verður varanlega forfallaður frá forsetastörfum, skal kjósa forseta í hans stað til loka kjörtímabils forseta.

#### 4. gr.

3. mgr. 31. gr. samþykktarinnar breytist og verður svohljóðandi:  
Kosningar, sem fram fara í bæjarstjórn, skulu vera hlutfallskosningar skv. d'Hondts reglu.

#### 5. gr.

2. mgr. 32. gr. samþykktarinnar breytist og verður svohljóðandi:  
Fundargerðir bæjarstjórnar skal skrá í tölvu. Í gerðabók bæjarstjórnar skal bóka númer fundar, hvar og hvenær fundurinn er haldinn og að fundargerð sé færð í tölvu. Þá skal færa í gerðabók, fundarslit og greina blaðsíðutal fundargerðar. Bæjarfulltrúar skulu rita nöfn sín við slit fundar í gerðabók. Heimilt er að nota rafrænar undirskriftir. Í lok fundar skal tölvuskráð fundargerð prentuð út, lesin upp og hún undirrituð af bæjarfulltrúum, ef ekki er notast við rafrænar undirskriftir. Forseti bæjarstjórnar og a.m.k. einn bæjarfulltrúi skulu setja upphafsstafi sína undir hverja blaðsíðu fundargerðar sem blaðsíðusettar skulu í hlaupandi töluröð. Undirritaðar tölvuskráðar fundargerðir skulu reglulega bundnar inn í fundargerðabók bæjarstjórnar til varanlegrar varðveislu. Fundargerðir sem eru undirritaðar með rafrænum undirskriftum skulu varðveittar rafrænt.

#### 6. gr.

2. mgr. 34. gr. samþykktarinnar breytist og verður svohljóðandi:  
Bæjarstjórn skal setja sér siðareglur sem staðfestar skulu af innviðaráðuneytinu. Öllum kjörnum fulltrúum ber að haga störfum sínum í samræmi við settar siðareglur.

#### 7. gr.

4. mgr. 44. gr. samþykktarinnar breytist og verður svohljóðandi:  
Framboðsaðili, sem fulltrúa á í bæjarstjórn en ekki í bæjarráði, má tilnefna áheyrnarfulltrúa, með málfrelsi og tillögurétt, í samræmi við 50. gr. sveitarstjórnarlaga. Hið sama á við um fastanefndir sem hefur verið falið fullnaðarákvörðunarvald, þó ekki barnaverndarnefnd. Ungmennaráði Reykjanesbæjar er heimilt að tilnefna áheyrnarfulltrúa sinn í fastanefndir og ráð sveitarfélagsins.

#### 8. gr.

2. mgr. 48. gr. samþykktarinnar fellur brott.

## 9. gr.

Eftirfarandi breytingar verða á B-lið 57. gr. A samþykktarinnar:

- a. 1. tl. orðast svo: *Sjálfbærni ráð*. Fimm aðalmenn og jafnmargir til vara.
- b. 8. tl. orðast svo: *Yfirkjörstjórn*. Þrjú aðalmenn og jafnmargir til vara skv. 17. gr. kosningalaga nr. 112/2021. Undirkjörstjórn: Þrjú aðalmenn og jafnmargir til vara. Undirkjörstjórnir skulu vera jafnmargar og kjördeildir í bæjarfélaginu og heimilt er að kjósa þær síðar.
- c. 10. tl. orðast svo: *Atvinnu- og hafnarráð*. Fimm aðalmenn og jafnmargir til vara.
- d. 12. tl. orðast svo: *Menntaráð*. Fimm aðalmenn og jafnmargir til vara, skv. 6. gr. laga nr. 91/2008 um grunnskóla.
- e. 13. tl. orðast svo: *Menningar- og þjónusturáð*. Fimm aðalmenn og jafnmargir til vara.
- f. 14. tl. orðast svo: *Stjórn Eignasjóðs Reykjanesbæjar*. Fimm aðalmenn og jafnmargir til vara.
- g. Við bætist nýr töluliður, 15. tölul., svohljóðandi: *Öldungaráð Reykjanesbæjar*. Þrjú aðalmenn og jafnmargir til vara.

## 10. gr.

5. mgr. sem breytist og ný 6. mgr. 61. gr. samþykktarinnar verða svohljóðandi:

Bæjarstjóra er heimilt, með samþykki bæjarstjórnarinnar, að veita öðrum starfsmanni bæjarfélagsins prókúru. Bæjarstjóri er æðsti yfirmaður starfsfólks bæjarfélagsins.

Formaður bæjarráðs gegnir störfum bæjarstjóra í fjarveru hans. Bæjarstjórn er þó heimilt að taka ákvörðun um hver skuli gegna störfum bæjarstjóra í fjarveru hans til lengri tíma.

## 11. gr.

62. gr. samþykktarinnar breytist og verður svohljóðandi:

Bæjarráð ræður í umboði bæjarstjórnar starfsmenn í helstu stjórnunarstöður hjá bæjarfélaginu.

## 12. gr.

71. gr. samþykktarinnar breytist og verður svohljóðandi:

Strax að lokinni afgreiðslu bæjarstjórnar skal senda innviðaráðuneytinu fjárhagsáætlun skv. 66. gr. og þriggja ára áætlun skv. 66. gr. Sama á við um endurskoðaða áætlun eða breytta skv. 69. gr.

## 13. gr.

2. mgr. 77. gr. samþykktarinnar breytist og verður svohljóðandi:

Bæjarstjórnin skal taka til umfjöllunar og afgreiðslu álit, greinargerðir og tillögur endurskoðanda. Bæjarstjórn skal hafa lokið fullnaðarafgreiðslu ársreikninga bæjarsjóðs, stofnana bæjarfélagsins og fyrirtækja hans eigi síðar en 15. maí ár hvert. Bæjarfulltrúar og bæjarstjóri skulu árita ársreikninginn. Eintak af ársreikningnum skal senda innviðaráðuneytinu og Hagstofu Íslands ekki síðar en 20. maí ár hvert ásamt skýrslu endurskoðanda.

## 14. gr.

Samþykkt þessi sem bæjarstjórn Reykjanesbæjar hefur sett samkvæmt ákvæðum 9. og 18. gr. sveitarstjórnarlaga nr. 138/2011, staðfestist hér með til að öðlast þegar gildi.

*Innviðaráðuneytinu, 4. október 2024.*

F. h. r.

**Guðni Geir Einarsson.**

*Ólöf Sunna Jónsdóttir.*